

# 2 TXIMÓTXIO

## Paoro Iokanatsopatakiti Iuaĩkana Tximótxiomoni

---

**1** <sup>1</sup>Tximótxio, nota Paoro iokanatsopata pitemoni. Teoso mereẽno nota, Kristo Xesosi iokanatinino ĩkapani, isãkire nisãpiretini ĩkapani. Kãkiti Kristo Xesosi nakiti ininiãua, Teoso txĩkitakari ixinire auãki inini, kotxi Teoso kamaenetapekari ikara ikamini.

<sup>2</sup>Pite Tximótxio namarite nitiretakiti atoko pitxaua. Aĩri Teoso, aãũite Kristo Xesosi pakini sikai ikinipoko erekari. Iamonĩkaina. Ikamaerekaxiniretaina.

### Paoro Ôtãkikiniri Tximótxio

<sup>3</sup>Nota parĩkauata Teoso ĩkapani. Ninirimane kitxakapirĩkarini parĩkauatini atokokana niparĩkauata. Nãkixinireẽ nimarotari maerekati nimakamakani, Teoso ĩkapani niparĩkauatakasaaki. Nota txari Teoso: “Erekapitikari pikamakiti Tximótxio ĩkapani,” nitxa. Nimisãkiretapikari Teoso pite ĩkapani, ĩkanõka, pokamara, ĩkanõka, pokamara nitxapika. <sup>4</sup>Nipiãtai. Nixinikari pite txiapatini nitakanapakasaakii, ininiã ninirekari naõkitinii iuaĩkana nipoxokoniuatini ĩkapani. <sup>5</sup>Nixinikari pite atão auikiniri Teoso sãkire. Merepanika pakiro Aróitxi inakoro, pinoro Eonisi inakoro pakini atão auikari Teoso sãkire. Nimarotapitikari pite apaka auikiniri Teoso sãkire ninoa auikiniri atokotxikana. <sup>6</sup>Ininiãkara nõtãkikai. Akoka niuako nitakasaakiri pikiiã, Teoso sikai parĩkatxi iua ĩkapani pikamini. Iuasaaki isikaposotiiretai ikara parĩkatxi pikamini ĩkapani. Iteene pikamariko ikara parĩkatxi iua ĩkapani.

<sup>7</sup>Teoso sikapekaua Erekarí Matamatakoti, ininiã !kapĩkareua. Iua Erekarí Matamatakoti sikataparatarí aãkixinire. Iua oerekaua atiraõkiuatiní. Oerekaua maerekatí aĩto nireẽkití amanirekakani.

<sup>8</sup>Ininiã !pipẽtatapirí aũũte sãkire pisãpiretini. Apaka !pipẽtatapeno nota, kotxi kateia ãki naua Xesosi sãkire nisãpiretini xika.

Maãtatsiirauata, Teoso iokanapirena erekarí asãpiretini xika, kotxi Teoso sikataparataua amisiritiko amĩteenekini !kapaní. <sup>9</sup>Teoso makatxakapekarí amaerekani. Iua akiritapekaua inakitiakorí aniniua !kapaní. Aparĩka kona txĩkitakarí Teoso makakatxakinirí amaerekani. Imakatxakarí amaerekani, kotxi inirekarí ikara atoko ikamini. Imakatxakarí amaerekani, kotxi inirekarí ikinipoko erekarí isikiniua. Itixi kamiko apisapanika Kristo Xesosi sikarí ikara erekarí atemoni. Iuasaaki imakatxakarí amaerekani. Iuasaaki akiritaua inakitiakorí aniniua !kapaní. <sup>10</sup>Uatxa Teoso oerekarí ikara erekarí kãkitimoni, kotxi amaerekani makatxakakarí Xesosi Kristo apokapeka !korapokoriti. Iua xipokapekarí ipĩkitxi. Isãpiretarí Teoso iokanapirena erekarí, kãkití mapinakani !kapaní, Teosokata ãtipirika auini !kapaní.

<sup>11</sup>Teoso mereẽno nota ikara iokanapirenatxi sãpiretakarí nininiua tĩkane. Imereẽno iua iokanatakítí kãkitimoni nininiua. Imereẽno Xoteo minakaniua oereẽkarí nininiua. <sup>12</sup>Teoso iokanapirena erekarí nisãpiretini xika, natatsiirauata. Iuaritika !nipẽtauata, kotxi nimarotarí Xesosi. Iteene nauikarí iua sãkire. Nimarotapitikarí iua nĩkatinino nota. Inĩkatiniritikano ikanapiríãko. <sup>13</sup>Teoso sãkire pitemoni noerekakítí iaõka poerekako apanakini, kotxi noerekakítí atão. Pauikapikariko Kristo Xesosi sãkire. Katiraõki pitxako, kotxi Xesosi nakítí atxaua. <sup>14</sup>Pimarotarí Teoso iokanapirena erekarí. !Pauritapirí ikoketikó. Teoso sikarí ikara iokanapirena pitemoni, apanakini pisãpiretini !kapaní. Erekarí Matamatakoti auaĩtotaua. Iua posotiireẽ pinĩkatariko Teoso iokanapirena pitemoni isikakítí.

<sup>15</sup>Pimarotarí kãkití Xesosi sãkire auiãkani Ásia tixine auakani takanapano nota. Aĩtariakorí Pixero inakorí, Emoxeni inakorí pakini takanapano nota. <sup>16</sup>Onesĩporo inakorí !itakanapano. Ninirekarí Teoso tiretinina iua aapoko auakani. Itokata ikamapoxokonitano nota. !Ipẽtatano kateia ãki nauakasaaki.

<sup>17</sup>Homa sitatxítí apokasaaki, initaãpotano nota, eereka apokano.

<sup>18</sup>Pite imarotarí iua iteene moianatinino nota, Épeso sitatxítí nauakasaaki. Ininiã nitxari Apiananirí: “Ninirekarí piamonĩkinirí Onesĩporo itixi xipokini õti manapisaaki.”

### Misirikaretxi Miteenekiko

**2** <sup>1</sup>Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiã iua sikari ikinipoko erekari atemoni. Ikara erekari sikataparatarari axinire. <sup>2</sup>Pite kenakotapekari nisäkire noerekakiti kãkitimoni. Ininiã poerekariko ikara iaõka apanakinimoni atão inakari kamakanimoni. Eereka ninoa posotari oerekiniri nisäkire noerekakiti apanakinimoni apaka.

<sup>3</sup>Sotato erekari miteenekari imisiritiko. Kristo Xesosi sotatone atoko atxaua, ininiã pimiteenekariko pimisiritiko sotato erekari miteenekiniri atoko. <sup>4</sup>Sotato parĩkauatakasaaaki, !ixinikaikari iparĩka mitxi ikamakiti sotato iminakanisaaki. Ixinikapikari sotato auĩte nireẽkiti ikamini, iauĩte poxokotiniri ikapani. Ikaranokara ixinikanãta.

<sup>5</sup>Ãtipekana nisãpiretai. Miteẽkari mitekatxi mapotõkire merepanika apoãkari apakapari imitekini ãki. Mitekatxi paniãtakari paniãtini iaõka imitekiniã, apakapari imitekini ãki.

<sup>6</sup>Ãtipekana nisãpiretai. Katakarereri poparĩkari nikari itakare merepanika, kotxi iteene iparĩkauata. <sup>7</sup>Pixinikariko ikara nisäkire. Apiananiri kamaimaroretai ikara.

<sup>8</sup>Pixinikariko Teoso iokanapirena erekari nisãpiretakiti kãkitimoni. Xesosi Kristo nisãpireta ikinimanemoni. Iua ipinaka atoko, iuaĩkana auãki itxĩkitakaãka. Iua Taviini apika mekaniri. <sup>9</sup>Natatsiirauata Teoso iokanapirena erekari nisãpiretini xika. Nota omanatakani iaxirikapekano kohẽtxiã, kokaniri iaxirikinina atoko, nota masikani ikapani. Teoso sãkire !iaxiriãka. Iaripireta ikini tõpati. <sup>10</sup>Teoso mereẽpekari kãkiti, imaerekani imakatzakini ikapani. Ininiã nota miteenekari nimisiritiko Teoso iokanapirena ninoa kenakotini ikapani, imaerekanina Kristo Xesosi makatzakini ikapani, ãtipirika Teosokata auinina ikapani. Iuusaaki peerekari.

<sup>11</sup>Nisãpiretaiko ia sãkiretxi atão inakari:

Xesosi Kristo ipina ate ikapani, ininiã amanirekakaniãri mitxi anireẽkiti, Xesosi nireẽkitinoka anirekiniã, ininiã aãuapika iuakata ãtipirika.

<sup>12</sup>Amiteenekiniãri amisiritiko Xesosi sãkire aãuikini xika, auĩtetxi atxauako iuakata. Akipatiniãri iua aimarotini, iua apaka kipatarari ate imarotini.

<sup>13</sup>Atxiĩti !akamari akamaenetakiti. Xesosi kamapitikari iua kamaenetakiti, kotxi iua !iposotari maerekati ikamini.

### Teoso Nitiri Atão Inakari

<sup>14</sup>Ikara nisäkire pikamaxinikaretana Xesosi säkire auiäkani. Ninoa Apiananiri apisatoõ apotiitakasaakia, põtäkikanako: “!Hĩtxitakapeua maxikatiĩka kãkiti säkire xika, kotxi !erekari,” pitxako ninoamoni. Kãkiti kenakotiniãri hĩtxitakakiniua, ininiã linirekaikarina Xesosi säkire auikinina.

<sup>15</sup>Tximótxio, pite Teoso nitiri pitxaua, ininiã iteene papaiaõkariko isäkire iõkatsopatakori Teoso apokaerekatinii ĩkapani. Ininiã !pipẽtauata, kotxi atão poerekari Teoso säkire iõkatsopatakori apanakinimoni. Teoso säkire iõkatsopatakori atão inakarinoka itxa. <sup>16</sup>Apanakini sãkirauatakasaaki, isãkiretarina sãkiretxi Teoso mapokaerekatakiniti. Ikara atoko !pisãkiretape. Kãkiti ikara atoko inakani takanapaãpotari Teoso. <sup>17</sup>Ninoa oerekakiti sãkiretxiti karõtxi arakakari atoko itxa. Ikara atoko inakari amianari iarikaãpota. Ikara amianari iarikini atoko, ninoa oerekakiti iarikaãpota. Itxĩkitakari kãkiti maerekati ikamini. Imeneo inakori, Pireto inakori pakini oerekakiti sãkiretxiti ikara atoko itxa. <sup>18</sup>Ninoa takanapapekari Teoso säkire atão inakari. Ninoa säkire: “Teoso õkitikapekana Xesosi säkire auiäkani ixinirena auãki inini ĩkapani. !Õkitikapanina iĩtona itixi xipokini õti,” itxana. Ikara ninoa säkire xika, apanakini !auikaikari Xesosi säkire.

<sup>19</sup>Aapokotxi tsota paikori inakasaaki, itsota iriko paĩtanori inakasaaki, iua aapokotxi !irika. Teoso säkire ikara aãtsota atoko. Auapika. !Ixipoka. Teoso säkire txari: “Apiananiri imarotari inakitiakori.” Apaka Teoso säkire txari: “Kãkiti, ‘Nota Kristo nakiti’ inakari takanapariko imaerekani.”

<sup>20</sup>Ikini sereti tiĩtxi aua aapokotxi mitari ãki. Aua apiata karonetakari oro kamakori, pirata kamakori pakini. Apaka aua poião ĩki aamina kamakori, kipatxi kamakori pakini. Apanakini tiĩtxi ãki kaapokori takari nipokori kiiniri ĩkapani. Apanakini tiĩtxi ãki itakari nipokori ikiniõtika kãkiti nikini ĩkapani. <sup>21</sup>Ikara tiĩtxi atoko itxa kãkiti. Kãkiti takanapiñãri imaerekani, tiĩtxi apiata karonetakari atoko itxa iua. Teoso nirekari iua. Imereẽri iua iparĩka erekari ikamini ĩkapani. Ininiã kãkiti iua atoko inakani iposope Teoso parĩka ikamini ĩkapani.

<sup>22</sup>Åtokoripanika pinakasaakia, apanakini nirekiniãi maerekati pikamini, pimitekako, maerekati pimamakamani ĩkapani. Pinirekariko atão inakarinoka pikamini ikiniõtika. Pinirekariko

Xesosi sākire iteene pauikini. Pinirekariko iteene katiraõki pinini. !Pinirekapiri neenamtxi. Ikara atoko kākiti kaminiā, erekaxinireri. Iua akiritari Apiananiri imoianatiniri ĩkapani.

<sup>23</sup>Tximótxio, kākiti txitakakasaakia sākiretxi miĩkiteti mimaroreti xika, !pikamapiri ikara atoko inakari, kotxi eereka ninoa neenamauata isākirena xika. <sup>24</sup>Apiananiri nitiri atão inakari ia atoko itxako: “!Itxitari āti. Itiretari ikinimane. Koerekareri erekari itxaua. !Katimari omanākarauatini. <sup>25</sup>Õtākikanako isākire mauikakani momanākaretika.” Ikara atoko Apiananiri nitiri ininiāua, atxiiti Teoso oerekana isākire mauikakani atão inakari imarotinina ĩkapani, imaerekani itakanapinina ĩkapani. <sup>26</sup>Ininiā uaiķkana kiĩkitepeka itxana. Teoso sikakana ninoa txikatoro Satanasi takakitiā, kotxi mitxi Satanasi maĩkana, iua nireĕkiti ikaminina ĩkapani.

### Itixi Xipokini Ōti Apisa

**3** <sup>1</sup>Tximótxio, pimarotariko ia nisākire. Itixi xipokini ōti apisa pamonõkopianiriko. <sup>2</sup>Iuasaaki kākiti ia atoko inakari: Kapotxinaniri iua. Txineiro tirketani iua. Isāpiretari iposotiire ikinimanemoni. Iuikaua. Imisākirepiretari Teoso, kākiti pakini. !Ikamari iri paniātakiti. Inoro paniātakiti apaka !ikama. Āti kamakasaakiri erekari iuamoni, !itxari: “Erekapitikari pikamakiti nota ĩkapani,” !itxari. !Inirekari Teoso. <sup>3</sup>!Itiretari inirimane. !Ikamari ikamaenetakiti. Imisākirepiretari āti maxikatiĩka. !Iposotari erekari ikamini. Paneenamari. Omanatana erekari kamakani. <sup>4</sup>Imĩkapiritari āti. Ikamakiti ikamini apisa, !ixinikari ikamakiti tĩkane. Iuaka ixinikapikaua. Isarauatininokara itireta. !Itiretari Teoso. <sup>5</sup>Iua sākire: “Nauikari Teoso sākire,” txamari !auikari Teoso posotiire. !Pauikapiri kākiti ikara atoko inakari sākire. <sup>6</sup>Kākiti ikara atoko inakari ianapokota sitomoni oaāpokomoni. Sito ikara atoko inakaro miĩkiteto. Maerekatinoka okama. Oĩto nireĕkiti maerekati onirekapika. Iua ianapokotapika oamoni, ininiā oa auikaāpotari iua oerekakiti sākiretxiti. <sup>7</sup>Sito ikara atoko inakaro nirekari oimarotiniri oerekaretxi, txamari !oimarotari oerekaretxi atão inakari.

<sup>8</sup>Kitxakapirĩka Moisesi Exito tixine auakasaaki, Xani inakori, Xāpiri inakori pakini !inirekari auikinirina Moisesi sāpiretakiti. Ninoa atokokana kākiti itixi xipokini ōti apisa auakani, !inirekari atão inakari. Ixinikapikarina maerekatinoka. Teoso !inirekari kākiti ikara atoko

inakari, kotxi iua kākiti !auikari Teoso sākire. <sup>9</sup>Poiāonoka kākiti auikari ikara atoko inakari sākire, kotxi imarotari mīikiteti iua. Iua atokokana kitxakapirīka apanakini imarotari Xani, Xāpiri pakini mīikiteni ininiua.

### Teoso Nakitiakori Misiritiko

<sup>10</sup>Pitepekana, pimarotapitikari noereēkiti sākiretxiti. Pimarotari nikamakiti ikiniōtika. Pimarotari ninireēkiti nikamini. Pimarotari iteene nauikiniri Xesosi sākire. Pimarotari nimiteenekiniri nimisiritiko. Pimarotari nitiretiniri āti. Pimarotari !katimari nomanākarauatini. <sup>11</sup>Pimarotari nimisiritiko. Pimarotari natatsirauatini. Pimarotari nimiteenekiniri nimisiritiko Ātxiokia sitatxiti nauakasaaki, Ikónio sitatxiti apaka nauakasaaki, Arisitara sitatxiti apaka nauakasaaki. Iteene natatsirauata, iuaritika Apiananiri makatxakano ikinika nimisiritiko. <sup>12</sup>Ari, ikininape kākiti nirekiniāri Kristo Xesosi nakiti ininiāua, inirekiniāri Teoso nireēkitinoka ikaminiā, atatsiitariko imisiritiko. <sup>13</sup>Iusaaki maerekati kamakani maerekani, komisirienenerini maerekani, apiaāpotako. Ninoa misirienetari apanakini. Apaka apanakini misirienetana ninoa.

### Teoso Sākire Iōkatsopatakori

<sup>14</sup>Pitepekana Tximótxio, pauikapikariko atāo inakari poerekiko. Ikara pauikapitika, kotxi pimarotana pite oerekakani. Pimarotari atāonoka ninoa oerekakiti. <sup>15</sup>Pite axapitipanika pinakasaaki, pimarotari Teoso sākire iōkatsopatakori. Iua sākire iōkatsopatakori txīkitakaua kimatire anini. Isākire iōkatsopatakori oerekaua Teoso makatxakiniri amaerekani Kristo Xesosi sākire aūikasaaki. <sup>16</sup>Teoso oerekana isākire iōkatsopatakani atāonoka iōkatsopatinina, ininiā ikinika Teoso sākire iōkatsopatakori atāonoka. Ininiā apakata Teoso sākire iōkatsopatakori oerekiniua atāo Teoso sākire aūikini ikapani. Oerekaua ikinipoko Teoso sākire iōkatsopatakori atāo inini. Isākire iōkatsopatakori ōtākikaua amaerekani atakanapini. Oerekaua atāo inakarinnoka akamini. <sup>17</sup>Ininiā kākiti Teoso nakiti imarotiniāri Teoso sākire iōkatsopatakori, iposotari ikinika parīkatxi Teoso paniātakiti ikamini. Erekarī iparīka.

### Tximótxio Ōtākikiko

**4** <sup>1</sup>Tximótxio, nōtākikai Teoso apisatoō, Apiananiri Xesosi Kristo apisatoō apaka, kotxi āti ōti Kristo Xesosi kanapiriākasaaki,

isãpiretari ikininape kãkiti sinimoni. Isãkire auiãkani sari Teosomoni ikaikotinina ïkapani. Isãkire mauiãkani sari kãkiti misiritikomoni ikaikotinina ïkapani. Isãpiretari kãkiti auapanika inakani, kãkiti mitxi ipïkani apaka. Xesosi kanapiriã ikininape auïte ininiua ïkapani, ininiãkara nipaniãtai ia: <sup>2</sup>Pisãpiretariko Teoso sãkire kãkitimoni. Iposope pitxako Teoso sãkire ikiniõtika pisãpiretini kãkitimoni, piïto tapara auakasaaki, pisãpakasaaki apaka. Põtãkikanako imaerekani itakanapinina, erekarinoka ikaminina ïkapani. Pisikataparaxiniretanako, Teoso sãkire poerekinina. Pisãkirauatakasaaki, !katimari pomanãkaruatini. <sup>3</sup>ãTi õti apokako. Iuasaaki kãkiti !inirekaikari oerekaretxi atão inakari ikenakotinina. Ninoaka nireẽkitinoka inirekana, ininiã apotiããpotana ninoakata koerekarerini ninoa potxitakiti oerekaretxiti oereẽkani. <sup>4</sup>!Inirekaikarina atão inakari. Auikarina sãkiretxi atão minakati.

<sup>5</sup>Pitepekana, ikinika pikamako piïkiteritika. Pimïteenekariko pimisiritiko. Pikamariko piparïka Teoso iokanapirena erekari pisãpiretini kãkitimoni ninoa auikiniri ïkapani. Teoso nitiri pitxaua, ininiã pikamariko ikinika piparïka Teoso paniãtakiti.

<sup>6</sup>Notapekana, nipinini õti manapi apokaãpotape. Nipinako Teoso ïkapani. Pirãtxi Teoso ïkapani okiko atokokana, notaka sikauako Teosomoni. Niketo apokapeka itixi nosipikini ïkapani. <sup>7</sup>Neenamtxi erekari inakari nikamapeka Satanasi ninaiatini. Miteẽkari mitekatxi mapotõkire apokini atokokana, nota apokapeka niparïka mapotõkire. !Nitakanapari Xesosi sãkire nauikini. <sup>8</sup>Uatxa Teoso nïkatari niparïka ïki nota kãiatakiti napakapini ïkapani. Miteẽkari merepanika mitekatxi mapotõkire apokakari apakapari imitekini ïki. Apakapari saporïeta. Iua atokokana Apiananiri sikanoko niparïka ïki, kotxi nota nirekari atão inakaranoka nikamini. Apiananiri imarotari atão, ininiã imarotari parïkatxi ïki apakapakani. Imarotari imisiritiko apakapakani apaka. Niparïka ïki isikano notamoni uai ikanapiriini õtisaaki. Na notananini apakapari. Isikari parïkatxi ïki ikininapemoni ikanapiriini nirekakanimoni.

### Paoro Iõkatsopatakiti Mapotõkire

<sup>9</sup>Piposotiniã, katima pitxako notamoni papokini. <sup>10</sup>Témasi inakori asikapekano, kotxi itiretari Xesosi sãkire mauiãkani nireẽkiti. Isipeka Tesarónika sitatxitimoni. Kiresẽtxi inakori sari Karásia tixinimoni iparïkauatini ïkapani. Txito inakori sari Taomásia

tixinimoni iparĩkauatini ĩkapani. <sup>11</sup>Arókasinokara moianatano uatxa. Pakiritariko Marko. Piminari iua pitekata. Iua posotari imiparĩkatinino, Xesosi sãkire nisãpiretakasaaki kãkitimoni.

<sup>12</sup>Txíkiko inakori nipaniãta Épeso sitatxitimoni isini. <sup>13</sup>Tóatxi sitatxiti nauakasaaki, nitakanapari nimãka ãti nimãka nopini nitakakiti. Nitakanapari iua nimãka Kapo inakorikata. Pite uai ĩkasaaki piminariko. Apaka piminariko atatsopari ninakiti aãtsopa kamakori. Apia ninirekari pimininiri atatsopari ninakiti aamata kamakori.

<sup>14</sup>Arexãtri inakori iteene misiritano. Iua Arexãtri tiitxi kamakari iua. Tiitxi metao kamakorinoka ikama. Iua misiritinino xika, Teoso misiritari iua. <sup>15</sup>Erepaniko iua. Pamonõkoniri iua, kotxi iua iteene misãkirepiretari aõereẽkiti sãkiretxiti.

<sup>16</sup>Merepitipanika nota apoĩtakani anikasaakino auĩtetxiakori apisatoõ, nisãkire ikenakotinina ĩkapani, na ãti nimoianari kaikota notakata iusaaki. Ikinimane nimoianariakori takanapano, iuaritika na ninirekari Teoso misiritinina itakanapinino xika. <sup>17</sup>Ninoa takanapano, iuaritika Apiananiri kaikota notakata. Iua sikataparaxiniretano, ininiã niposotari Teoso iokanapirena ikinika nisãpiretinina ninoa Xoteo minakaniua ikenakotinirina ĩkapani. Ininiã ãkiti namaã takote nauakasaaki, Teoso tokapakeẽtano nota. <sup>18</sup>Nimarotapitikari Apiananiri tokapakeẽtapanikano nota ikini sereti maerekati auakasaaki. Iua nĩkatano. Anikano itixinemoni, iua auĩtetxi ininiãtaãua. Ikinimane ãtipirika sãpiretari iua: “Peerekai. Pitenokara erekari.” Ameẽ.

<sup>19</sup>Pisãpiretana Pirisira inakoro, Ákira inakori pakini nixinikamanapitana. Apaka Onesíporo inakori aapoko auakani nixinikamanapita. <sup>20</sup>Erásito inakori kaikota Korĩto sitatxiti. Tópimo inakori nitakanapa Mireto sitatxitiã, kotxi iua amianata.

<sup>21</sup>Tximótxio, piposotiniã, mitaã apisapanika papokako uaimoni. Eoporo inakori, Porotẽtxi inakori, Arino inakori, Karáotxia inakori pakini ikini aĩtariakorikata iokanapireta pitemoni ixinikamanapitiniina.

<sup>22</sup>Apiananiri Xesosi Kristo ãtipirika kaikota pitekata pãkixinireẽ. Ikinipoko erekari isika pitemoni. Ameẽ.